

Uitgave juni 2006

Jieëdere 3^e weëk van de moand presentere vieër os "Bie Wieze Van Sjpreëke", in de Trompetter. Vier nuëdige jieëderree oet om hie aan deel te numme. Doer 'n sjtukske te sjriev en noa onge sjtong e-mail adres te sjikke, of om 'ns langs te komme op een van os oavende; de 2^e moandig van de moand om 20.00 oer Schoolstraat 4 in Broenssem.

Zulderos

Ich weet neet wie 't is begos
Vier neumde Harie „zulderos“
't Woar eenmaal ene hoddelsjong
En ging zoeë bie jieëderree uëver de tong
Moeëder zag: "Dat zeët me neet!"
En zoeëduks dat 't mich sjpeet
Doe koame vier Harie gans braaf teëge
Jummich wurdt mich der jong verleëge
Vier woste neet wat doe begos
Der Harie blief toch ene zulderos
Wiel Roeselers

Kinne

Aan 't kreëgske kin ich 't kammezoal
Der pater kin ich aan ziene kal
De begien aan heur sjluier
Inne kok kin ich aan zien gerech
De heks aan heure bessem
Zuud-Limburg aan zien huëvelkes
Jieëkerinne kin ich
Mer ich kin mich ege neet!
Jan halmans

Communicatie

Heët iemesj d'r oeëts al ins bie nao gedach,
Woeërom v'r bie communicatie regelmatig in probleme vervalle?
Die vroagsjtilling is natuurlijk hieël verdach,
Mer kump natuurlijk neet zoeë mer oet de loch gevall!
En egelik is 't antwoeërd hieël simpel,
Alleen wurd dat noeëts rech oet gezag!
V'r dinke 't waal allemaal te kinnen oane inne rimpel,
Alleen wurd doeër de meeste luuj zoeë zelden d'r bie naogedach!
Ron Logister

Gans zach....

...zint de oavendsjtónde wen d'r sjeëmer gans lankzaam zieng intree deet.
Doe höbs dieng wirksjkes gedoan en d'r klinge jóng van dieng dochter in zieng bedje gelag.
Frisj gewesje kumps-te ónger de broes oet en lups-te nog 'n rundje durch d'r gaad en doe vröags dich
aaf woeëvuur das-te 't egelik allemaal doogs.
De vermuidheid in dieng knôak begint waarechtig plezierig te gluie, dat höbs-te verdeend en dat kriegs-
te dan óch.
Momente, woeëops-te mit ing tevreëje zuch effe kins goa zitte, kins achteruëver leune.

Doe kieks umhoeëg...in de óneindigheid van 't besjtoa en doe bewóngers de zijwarbele , die nog
 ummer in ónvermuibare geesdrif, in al hun sjarme de oavendlóch durchsjipliete.
 Doe bewóngers de oerkraft van diene meidöarehek, deë óndanks zien weëkeleks gevech mit de
 hegkesjier ummer weer grujt en greunt.
 Doe bewóngers de basjtende blómknöp en de bedwelmende ruëk van de kamperfoelie.
 Deë ouwe verwilderde sjtroek langs de moer.
 'n Oaligbieëske krüpt uëver diene erm en ing meële in d'r biereboom loesterd 't letste oavendlich óp.
 Ing dieke broene hoemel sjtiegt sjwoar belane en benieëveld durch de nektar umhoeëg oet de beëker
 van 't parse vingerhoodskroed.
 Van wietaaf weëd de sjtilte groaf versjtuurd.durch 't geschrei van brómfietsse.
 De ónsjuldigheid van de jeug.
 Sjtil bluid de purpere kroeeën van de wille akelei, geboage ónger zien ege gewich, zoeëdat heë beinoa 't
 water van de viever raakt.
 Doe dinks; 't leëve is wie ing blóm die wil bluië.
 En noa de blui kómme de dieke kale knöp, basjtend van 't zoad woeë 't nieëgste joar weer de vólle
 sjoeënheid van 't nuie vuurjoar mót oetkómme.
 Ooch wents-te d'r zelf neet mieë bis...
 Ópins krieg ich hóndervel op miene ruk.....

Thei Janssen

'n Welt vol kranke

Ich zoog lits oppe TV
 'n kapot gesjoate landj
 'n gans ermzieëlig bild
 verloate kinjer, handj in handj

Ich hoeërd oppe radio
 Egelik is 't toch te gek
 'n kinjerliekske gevonge
 urge tusje der drek

Ich loos in de gezit
 't dreuvige berich
 mishanjelde gevangene
 vas gehoute oane gerich

Ich zieën, ich huër, ich leës
 't toervelt rondj in mien gedanke
 soms hub ich 't idee
 de welt is vol mit kranke
 Wiel Roeselers

Aan 't forneus: Zoeërvleesj

Wat me nuëdig hat:

Rindjvleesj in lepkes of aan sjtuk, peëper, zout, essig, water, maggi, 1 eëtleëpel zeem, 2 laureerbleër,
 4 gruffelsneëgel, 2 diekke unne

Wie me 't makt:

't Rindjvleesj mit peëper en zout der op in ene komp doeën.
 Laureerbleër, gruffelsneëgel en unne in ring of sjtukker gesjneije derbie doeën.
 Op 1 glaas water 'n hauf glaas essig der uëver sjudde.

2 daag loate i trikke en aaf en toe omdrieë.
Vleesj oet de bruij hoale en druëgdeppe, de bruij zeve.
leësj 't vleesj broen bakke, de unne der bie mit de kruje.
De bruij aan de koak bringe en der bie doeën.
Dan nog inne eëtleëpel zeem der bie doeën.
Went 't vleesj gaar is de saus aafmake en get maggi der bie doeën.
Effe koare of de sjmaak good is, zoeënuëdig get essig of zeem der bie doeën.
Dat 't uch good maag bekomme!

Bie wieze van sjpreëke

Onkroet gruijt in jieëdere gaard - Er is overal wel iets
Inne miensj is gene eërpel - 'n Mens kan veel verdragen, maar niet alles

Heemkunde ver. Bron v. Brunsham: Schubertstraat 6 6444 BB Brunssum (ed.van.gelder@wanadoo.nl)
Dialectgroep: Folkloriada 15 6441 DW Brunssum (w.roesellers@hetnet.nl)